

輿地紀勝

八

宋元地理志叢刊

(宋)王象之・撰

李勇先・校點

四川大學出版社




輿地紀勝

宋王象之撰

中華書局影印

卷一百一十五





四川大學出版社

宋元地理志叢刊

(宋)王象之·撰

李勇先·校點

輿地紀勝

八

責任編輯:莊 劍 徐聞文 熊 志
責任校對:王大用 洪 滔 杜 偉 李文傑
責任印制:楊麗賢

圖書在版編目(CIP)數據

輿地紀勝校點 / (宋) 王象之原著; 李勇先校點.
成都: 四川大學出版社, 2005.10
(宋元地理志叢刊)
ISBN 7-5614-3250-X

I. 輿... II. ①王... ②李... III. 歷史地理-中國
-宋代 IV. K928.644

中國版本圖書館 CIP 數據核字 (2005) 第 111031 號

書名 輿 地 紀 勝

作 者	[宋]王象之 原著 李勇先 校點
出 版	四川大學出版社
地 址	成都市一環路南一段 24 號 (610065)
發 行	四川大學出版社
印 刷	成都東江印務有限公司
成品尺寸	140 mm×202 mm
印 張	212.625
字 數	4100 千字
版 次	2005 年 10 月第 1 版
印 次	2005 年 10 月第 1 次印刷
定 價	980.00 圓(全十冊)

版權所有◆侵權必究

◆讀者郵購本書,請與本社發行科
聯系。電話:85408408/85401670/
85408023 郵政編碼:610065
◆本社圖書如有印裝質量問題,請
寄回出版社調換。
◆網址:www.scupress.com.cn

輿地紀勝卷第一百四十六

嘉定府

凌雲 漢嘉 三峨 嘉陽 嘉陵 犍爲

【府沿革】

嘉定府，嘉州，犍爲郡，嘉慶軍節度。《嘉定志》。《禹貢》梁州之域。《元和郡縣志》。按《漢志》：「秦地，於天官應東井、輿鬼之分野。《晉志》云：「蜀入參一度，犍爲入參三度。」與《漢志》異，當攷。秦爲蜀郡。今府即漢犍爲郡之南安縣地也。此據《元和郡縣志》。而《漢志》應劭注云：「故夜郎國。」又沈約《宋志》亦謂漢武帝建元六年開夜郎國，置犍爲郡。而《寰宇記》亦謂漢武帝使唐蒙開夜郎，立犍爲郡。象之謹按：《華陽國志》云：「分巴割蜀，以成犍、廣。」則是武帝分蜀郡以益犍爲郡也。又《鄧通傳》通爲南安人，則是武帝未開夜郎之前已有南安縣矣。特武帝開夜郎置犍爲郡，因割蜀郡之南安縣隸于犍爲，故總

而言之曰犍爲郡耳，非取夜郎之地而建爲南安縣也。應劭注《漢史》及唐《通典》雖有夜郎之文，而《元和志》初不及此二者，俱爲唐地理書、《元和志》作於《通典》之後，而無所引證，已知其誤矣。兼《漢·地理志》夜郎縣乃屬牂柯，而應劭於犍爲郡下雖注曰「故夜郎國」，而劭於牂柯郡之夜郎縣下又注曰「故夜郎侯邑」。蓋國者總而言之，爲夜郎之地；而邑者別而言之，爲夜郎之所都也。應劭之注，固未嘗以無辨。又《輿地廣記》云：「犍爲郡初治犍縣（二）。」蓋在今瀘州南徼之外。以象之攷之，兩《漢志》及《晉志》夜郎、犍縣皆屬牂柯郡，而沈約《宋志》夜郎屬夜郎郡，犍縣屬平蠻郡，皆晉永嘉中所置，屬于甯州，則夜郎犍縣非嘉定也。《輿地廣記》又云：「犍爲郡，初治犍縣，後徙治犍道。」即今之叙州。《元和郡縣志》云：「漢昭帝時，犍爲自犍道徙治武陽。」即今眉之彭山。《輿地廣記》又云：「後周徙治新津，最後徙治南安。」即今之龍遊。蓋犍爲之地爲夷所侵，則徙入內地以避之，則夜郎故邑乃今南徼之外羈縻等州耳（三）。《通鑑》晉紀永和元年載：「獠從山出，自巴西至犍爲，布滿山谷，十餘萬落，大爲民患，四境之內，遂至蕭條。」《元和郡縣志》於嘉州書云：「後爲夷獠所侵。梁武陵王紀開通外徼，始立青州。」又於資、榮、渠、簡、邛、眉等州皆書云「爲夷獠所侵」，或曰「郡縣荒廢」，或曰「爲獠所沒」，或曰「移治某所」，於蜀州又書曰「西魏時犍爲郡移理於此」，則今之犍爲非盡古之犍爲也，此皆諸書所不載，唯《元和志》載之特詳，故附見於此。晉時爲夷獠所侵。梁武帝時，

武陵王紀開通外徼，立青州，取青衣以爲名。此據《元和郡縣志》。大抵犍爲諸郡之地爲夷獠所侵，至梁招撫之後，其地始再歸王化耳。《元和志》於眉州書曰「在太清三年」，而《寰宇記》書曰「後魏道武於此立眉州，尋改青州。末年分平羌等縣立嘉州」。象之謹按：魏道武在晉時立國於代北，足跡未嘗至蜀，豈能於蜀遙立郡縣？其說不可據，今不取。西魏平蜀，改青州爲眉州，取峨眉山以爲名。《後周·帝紀》云：「西魏廢帝二年，平蜀。三年，改青州爲眉州。」而《元和郡縣志》及《寰宇記》皆不書於嘉州，而書於眉州。按嘉、眉二州，自唐以前本爲一州，則二者所書不容不同（三），今取眉州之志以補嘉定之闕。後周復曰青州。《通典》及《隋志》眉山郡下云：「西魏曰眉州，後周曰青州，後改嘉州。大業二年，改曰眉州。」而後周青州之改無年月可攷。象之謹按：《嘉定志·都安王廟碑》書曰（四）：「後周保定二年，初置青州。」又改曰嘉州，以漢嘉郡以爲名。《元和郡縣志》在周宣帝二年。《嘉定志》云：「後周改曰青州，後以九州之名相亂（五），又改曰嘉州。」象之謹按：周天元皇帝未併高齊之前，則青齊之地尚屬高齊，不應州名相亂。《通鑑》載建德六年併齊，次年改元宣政。今當改《元和郡縣志》「宣帝二年」爲「宣政二年」，庶幾年月相應。蓋周天元併齊之後，既有青、齊之青州，又有蜀中之青州，州名相亂，不得不改。又《都安王廟碑》亦云：「隋開皇九年，置青衣縣。後周保定二年，置青州。宣政二年，始爲嘉州。」年月實同。隋改嘉州爲眉州，又改爲眉山郡。

《隋志》云：「大業二年，改嘉州爲眉州。」《元和郡縣志》謂「大業二年，併嘉州入眉州。八年，改爲眉山郡」。唐復爲嘉州。《舊唐志》云：「嘉州，隋眉山郡。武德元年，改爲嘉州。」割嘉州之五縣別立眉州，而嘉州如故。《元和郡縣志》：「割嘉州之通義、洪雅等四縣別置眉州。」改犍爲郡，《新唐志》云：「本眉山郡。天寶元年，——。」復曰嘉州。《唐志》在乾元元年。唐中世號都督府，《嘉定志》韋臬所撰《九頂大像記》：「貞元十九年，使持節都督嘉州諸軍事、嘉州刺史、充本州經略使。」以是知——，嘉州——，又有經略使之名。尋罷。《寰宇記》。僞蜀王氏、孟氏繼有其地。《通鑑》：「昭宗大順元年，嘉州刺史朱寔舉州降于王建〔六〕。後唐莊宗同光三年，以孟知祥爲西川節度使〔七〕，而嘉州實所統隸。」國朝平蜀，仍爲嘉州。乾德三年。甯宗即位，以潛邸陞嘉定府及嘉慶軍節度。按李暉《嘉慶軍樓記》云錫名嘉慶在開禧元年十一月〔八〕。今隸成都府路。領縣五，治龍遊。

【縣沿革】

龍遊縣 上

倚郭。《舊唐志》云：「本漢南安縣地，屬犍爲郡。」《輿地廣記》云：「本漢南安縣地，初屬蜀郡。武帝時，隸犍爲郡。東漢因之。」《寰宇記》云：「周武帝保定

二年〔九〕，於此立平羌縣。」《隋志》云：「後周於此置平羌郡。」《寰宇記》云：「開皇郡廢，爲嘉州。四年〔一〇〕，爲峨眉縣。九年，改縣爲青衣。開皇十年〔一一〕，改爲龍遊。以隋伐陳，有龍見於江，引舟而還〔一二〕，故名。大業初，置眉山郡。」《國朝會要》云：「熙甯五年，省平羌併入焉。」又云：「宣和元年，改嘉祥縣。紹興元年，復爲——。」

夾江縣 中

在府北七十里〔一三〕。《舊唐志》云：「本漢南安縣地。隋分龍游、平羌二縣，於涇上置——。今北八十里，有夾江廢戍，即此也。」《元和郡縣志》云：「開皇十三年〔一四〕，割平羌、龍游二縣地，於夾江廢戍置——，屬嘉州。大業二年，割屬眉州〔一五〕。武德元年〔一六〕，却隸嘉州。」《舊唐志》云：「舊治涇上，武德元年，移於今治。」皇朝因之。

犍爲縣 中

在府東一百二十里〔一七〕。《元和郡縣志》云：「本漢南安縣地。周於此置沉犀郡，并立武陽縣。隋開皇三年廢郡，以縣屬戎州，又改武陽爲犍爲縣。前上元二

年〔二八〕，割屬嘉州。《寰宇記》云：「後周保定三年，於沉犀山下置沉犀州。隋開皇三年，廢沉犀，於大鹿山置犍爲縣。唐舊在武陽故城〔一九〕，後屬戎州〔二〇〕。上元元年，隸嘉州。天復元年〔三一〕，夷獠叛於江之西。」《國朝會要》：「乾德四年，省玉津縣入焉。祥符四年，徙治懲非鎮。」

峨眉縣 中

在府西九十里。《元和郡縣志》云：「本漢南安縣地。周武帝於此置平羌縣，後改平羌爲——〔三二〕，又以爲青衣縣，乃別立——，枕峨眉山東麓，故以爲名，屬嘉州。」《隋志》云：「開皇十三年〔三三〕，置——。」《元和郡縣志》又云：「大業二年〔三四〕，割入眉州。唐武德又屬嘉州〔三五〕。」《皇朝郡縣志》云：「舊治山東，唐乾元三年夷叛，徙今治。」《國朝會要》云：「乾德四年，併綏山、羅目二縣皆隸焉。」《益州記》云：「峨眉去成都僅千里，秋日澄清〔三六〕，望見兩山相對若峨眉。」

洪雅縣 上

在府西一百三十里〔三七〕。《元和郡縣志》云：「本齊樂郡之南境也〔三八〕。自晉迄宋，夷獠有其地。周武帝攘却夷獠，立洪雅鎮。」《寰宇記》云：「在後周天和二

年。』《隋志》云：「開皇十三年，置——。」《元和郡縣志》云：「縣西有洪雅川〔二九〕，故名。」《輿地廣記》云：「初屬眉山郡。唐武德元年〔三〇〕，置犍州。正觀元年，廢屬眉州。開元七年，置義州，并以獠戶置南安、平鄉二縣。八年州廢，省二縣，以洪雅屬眉州。」《國朝會要》云：「淳化四年，來屬嘉州。」

【監司沿革】

成都府路提點刑獄司

《嘉定志》云：「憲治自成都遷於嘉州，此天聖之議也。」邵伯溫《題名記序》：「自天聖至今，廨葺治增廣，在府城之北街，亦曰小市，有靖民堂、萬卷堂、明允軒、盡心堂、清遠閣、枕江樓、種德堂、觀風堂。」《成都志》云：「大觀中，移治嘉州。」不同。又《眉州志》云：「天聖四年，益州路提點刑獄司以眉州爲治所。五年，薛向乞移益州。景祐元年閏六月，依舊眉州〔三一〕。二年十月，知益州王巖又乞移益州。至和初，移嘉州。大觀元年九月，成都轉運判官□穀又乞移嘉州〔三二〕，備夷人也。」

【風俗形勝】

益州以蜀郡、廣漢、犍爲爲三蜀，土地沃美，人士俊乂。《華陽國志》。西有熊耳，南有峨眉。《華陽國志》。東接江陽，南接朱提，北接蜀郡，西接廣漢。王喬升其北山，彭祖家其彭蒙。白虎仁於廣德，寶鼎見於江溉。《華陽國志》。青山綠水中二千石。《海錄碎事》云：「僞蜀歐陽彬守嘉州（三三），曰——爲——，作詩飲酒，爲風月主人，豈不佳哉！」風月主人。同上。溪上之景凡十有五。唐正觀中，刺史盧士理列——，曰望靈峰，曰西嶺精舍，曰石梁水，曰後壑，曰分溪塘，曰挂竹汀，曰梭原，曰茗岡，曰六度潭，曰長林閣，曰望山臺（三四），曰青倩徑（三五），曰山樞園，曰石壑院，曰南州草堂，並爲賦詩，因刻石山中。襟帶二水。《水經》云：「南安縣治青衣江，會——，蜀開明故治也。」戶有橘柚之園。《文選·蜀都賦》注曰：「出犍爲南安縣。」南對峨眉，北連象耳。《寰宇記》夾江縣下。兩山相對，狀似峨眉。《寰宇記》。嘉之山水，號吾蜀冠冕。劉伯熊《提刑司幹辦公事題名》（三六）。蜀爲西南巨屏，繇漢以來，號爲多士，莫盛於眉、益二邦，而嘉次之（三七）。崇甯二年任熙明《教授題名記》。天下山水之勝在蜀（三八），蜀之勝曰嘉州。邵博《題清音亭》。坤維四十州，伊嘉陽之郡，得江山之助。田錫《嘉樹圖贊》。漢嘉江山雄秀，三峨之勝聞於天下。楊輔《貢院記》。漢嘉背負三峨，襟帶二江，

爲西南州最清曠處〔三九〕，故地靈而人秀。大觀二年鮮于繪《府學議道堂記》。吾州山水，於蜀爲孤清秀絕。鮮于之武《谷神亭記》〔四〇〕。嘉州邑屋，無遠近穴窗則見江山，而蔽虧多寡得之皆不同。蔡迨《清鮮亭記》〔四一〕。嘉爲嘉善之城〔四二〕。員興宗《李氏林亭記》。犍爲江山，爲西蜀最〔四三〕。李章《嘉望亭記》。左九頂而右三峨，清水橫其前。鮮于之武《谷神亭記》。昔城嘉者，以山水爲壙藩〔四四〕。姚嗣宗《龍岩院記》。犍爲邈在西南之隅，江山秀麗，草木欣榮〔四五〕，號兩蜀佳處。任熙明《萬壽寺碑》。峨眉自楊文莊公爲之邑長，田公諫議客其門，流風所被，文教興焉。劉光祖《峨眉縣學記》。李白之歌平羌，岑參之謠青衣，薛能之集江干，司空圖之賦凌雲，是皆模寫物色之形容，以誇詡於世者多矣。楊天惠《水墨石記》。天下山水窟二：曰嘉定，曰桂林。鄧諫從《江山堂記》曰：「予聞之石湖云。」嘉州當荆、蜀、渝、瀘要道。宇文粹中《萬景樓記》。山川風物，近似洛中。晁公武過符文鎮。謂——，——，因家焉。分巴割蜀，以成犍、廣。《華陽國志》：「蓋漢時割巴、蜀二郡之地以成犍爲、廣漢二郡故也。」今之犍爲非漢夜郎。《輿地廣記》云：「漢武帝開夜郎，置犍爲。平夜郎，以置犍爲郡。然郡之北境大半爲巴蜀舊縣〔四六〕，如南安、武陽、牛鞞、資中、江陽、犍道是也。而《漢史·地理志》夜郎縣乃屬

梓柯郡，則知今嘉州犍爲縣非夜郎故地。」後世徒見嘉州名犍爲郡，又領犍爲縣，遂以爲本夜郎國，失其真矣。地大且要。蘇洵《上吳職方書》云：「蜀之——，無如益與嘉者。」抗峨眉之重阻。《蜀都賦》。

【景物上】

南犍。韓魏王詩：「主人獨戀——樂（四七），只恐瓜期未肯歸。」南山（四八）。《志》曰：「今嘉定。東巖。在府城東佛峽。山水明秀，有洞曰——，泉宜釀酒，坡詩「一時付與——酒」，謂此也。蒙水。一名青衣水，一名大渡水。蒙以山名，青衣以縣名，大渡以溪名。今日雅江（四九），以州名（五〇）。蒙山。《嘉定志》云：「《禹貢》梁州之山四，岷、嶓、蒙、西。背岷，北山背嶓，南山背蒙，峨眉之在《禹貢》，則蒙山之首也。」瀘江。岷江也。《禹貢》：「岷山導江，入于海。」凡以入海書者，惟瀘爲然。沫水（五一）。一名濊水，一名洊水，今日陽江。呂沈曰（五二）：「洊水出蜀。」《水經》曰：「——出廣柔徼外。」《漢志》云：「出汶江。」《寰宇記》云：「在舊羅目縣。《華陽國志》云：「青衣有——，出蒙山下，伏行地中，會江于南安，水脉漂疾。李冰爲蜀守，乃發卒鑿平瀾崖，水神最怒，冰乃操刀入水中，與神鬪。」即此水也。」陽江。——者，蜀南山之水所交委也（五三）。聖崗。即郡治前崗。杜甫詩云：「遠村通

後逕，一郡隔前崗。」三洞。在北門外白崖院，名曰朝霞、白雲、清風，寬廣可容百數人（五四）。孤山。即離巢。山離峰者（五五），——也。《詁訓》云：「爾蜀江有離巢，蜀漢亦有離巢。府治——，當瀆江、沫水孔道，曰烏尤者，四面斬立，乃真離巢，與永康所記不同。象之謹按：離之與孤，自是兩義，江州之大孤、小孤，取其孤立於江中之義也。清湘有湘水、離水，取其初本于一源，強分爲二，以其有相離之義也。湘水初出龐都山，北流入洞庭（五六）。自秦平百越，欲通運道，始鑿山築堰，強分湘水之半南流入廣，始命曰離水，正以其有相離之義。今嘉州之離巢乃天然孤立，名之曰——，正猶江州之大（五七）、小二孤命名是矣。永康、崇德之離巢，乃秦太守李冰鑿山爲二，中爲大渠，引水灌成都以通堰水，其取相離之義，亦由湖南之離水耳（五八），命曰離巢，豈不甚當。今《嘉定志》乃指——以爲離巢二義，殊不相類。既故老相傳，姑兩存之。大江。《寰宇記》云：「一名汶江，俗名通江，自平羌縣界流入。《水經》云：『江東南過犍爲武陽縣南，青衣水從西南注之。』」又云：「東至南安，爲璧玉津。」月峰。在峨眉山。雷洞。在峨眉山。《嘉定志》：「——七十二穴，雷神居之，時出雲雨（五九）。」月巖。李昌圖之亭榭也。有九洞，豁舒間鑲佛像，榜曰——九洞，有蒙泉亭。綏山。即中峨山。按劉向《列仙傳》：「周成王時，有神人葛由（六〇），騎木羊止此山，故里諺曰：『得——一桃，雖不得仙亦足豪。』」故此山又名——。《寰宇記》：「在峨眉山西南。其高無極。」化山。在夾江縣

三十里〔六一〕。李阿真人煉丹於此。白水。在峨眉山。自雷洞出。黑水。在峨眉山。自月峰出。元石〔六二〕。太平興國二年〔六三〕，夾江縣民王詣於天名山下，得——二，皆有丹文，其一云：「君王萬萬歲。」其一云：「趙二十一帝。」緘其石以獻，具在《國史》。太平興國七年，舒州亦進文石。金釜。紹興中，峨眉縣金淵牧童於水中得金鼎一枚，紫色，蓋道人丹竈，其文云：「永和五年天根堂張造，重八十四斤。」進之行在。石人。《蜀記》云：「昔諸葛亮南征蠻中，十里刻一石人。今黎嵩路尚有存者。」龍門。在峨眉縣西十里。通判葛宮有記云：「意其孫思邈棲真之所〔六四〕，且隨其景，各賦詩曰龍化〔六五〕，曰種玉溪，曰真人岩〔六六〕，曰藥竈，曰藥臼，曰朝真臺，曰養龍潭，曰線水崖，曰虎跳石，曰茶蘼洞〔六七〕，曰瀑布崖。龍泓。在龍遊縣之龍岩山。東坡送張嘉州詩「夢中却到龍泓口」，是也。龍池。李膺記，在峨眉山下。龍谿。在龍遊縣。出徼外，入大江。蟹泉。在夾江縣西，古名平岡化。《道書》云：「天下二十四化，此其一也。」山有石龜，龜尾下有清泉，金蟹常踴躍其中，今名。魚泉。即羅目江。其表兩穴瀕江州南山趾〔六八〕，一如車輪，一如五六斗盎，吐雷迸疾，冬夏若一。蜂穴。《嘉定志》云：「符文江出峨眉山。山有二水，北則虎谿〔六九〕。」馬湖。即古若水也。《漢志》：「若水出徼外。」花谿。在洪雅西南，出廬山郡界。《舊經》云：「葛洪嘗隱此谿。南有崖洞，即丹竈之

所，有仙人像。」檀谷。在龍游縣安國鎮白檀山西南一十里。秦水。在峨眉縣西南三百餘里。《舊經》云：「秦惠王伐蜀，克之，徙秦人萬家以實焉（七〇）。秦人思秦之涇水，於其水側置戍，謂之涇口戍。天寶六年，改名秦水。」漢水。漢成帝時，得古磬十六枚于——之濱。漢嘉。李暹《嘉應軍樓記》云：「漢室中否，公孫述僭帝梁益，時惟青衣不賓，光武聞而嘉焉。順帝陽嘉二年，改名——。」嘉魚。《毛詩》：「南有——。」《蜀都賦》：「——出于丙穴」者也。嘉木（七二）。《寰宇記》：「在舊羅目縣東南三十里陽山江溉（七二），兩木對植，圍各三丈五尺（七三）。上引枝橫亘二丈圍徑，相援連理，陰庇百尺，其名黃葛，號——。」田錫記云：「或曰生於後漢之世，或稱茂於後周之時。」

【景物下】

壁津樓（七四）。在府城之東南隅（七五）。跨城爲樓，下瞰三江，三峨九頂，森列左右。提刑陳謙建。枕江樓（七六）。在憲司廨宇之後。左窺龍泓，右瞰烏尤，三龜、至樂、九頂諸峰列其中，濱江貫其前，高明爽塏，得江山之勝（七七）。三賢堂。在南山。迺謫仙、東坡、黃太史也。萬景樓。在郡治安樂園之上（七八）。宣和太守呂由誠作（七九）。所望闊遠（八〇），諸邑邊塞指顧目覽（八一），盡在掌握。范石湖詩云：「若爲喚得涪翁起，題作西南第一樓。」太守郭益榜其下曰西南第一樓（八二）。載酒堂。在大佛寺山上。取坡詩「載酒凌雲遊」之義（八三）。鎖碧